

## **Es et am räane?** Karl Küpper (1905-1970) ze Ihre

Du setz bovven *op* d'r Bütt.  
Em Saal weiß jeder, wat jetz kütt:  
Och die Nazis en d'r eeschte Reih.

Rasse-Stuss un Brung-Hemb-Marsch –  
All dat weed vun dir verarsch –  
Dä Goebbels-Lall, die janze Hitlerei.

Du kriss Prüjel, kriss Berufsverbott.  
Du weiß: Se schlage dich kapott.  
Du jeihs zor Wehrmaach – nit mih *op* de Bütt.

Fünfunveezich dann, em Mai:  
Uns Stadt zerbomb, doch endlich frei!  
Du weiß, wo brunge Dreck em Keller litt.

Jo, verdötschte Küppers Karl:  
Du häs jestört em brunge Karneval.

Widder *op* d'r Bütt, noh'm Kreech,  
Jeihs du met denne en et Jereech,  
Die do setze en d'r eeschte Reih.

Dieselve Köpp: statt brung jetz schwatz.  
Se blose widder dich zor Hatz.  
En Bonn, dä Adenauer, es dobei.

Dä brunge Jeis, dä es nit fott:  
Hä määt dir et 'come back' kapott.  
Dat häld di ärm kölsch Heldehätz nit us.

Ävver mer verjesse nit,  
Weil dinge Mot uns Hoffnung jitt:  
Mer wääde laut – mem Schweije es jetz Schluss!

Jo, verdötschte Küppers Karl:  
Et räant allt widder – üvverall!

Dä brunge Jeis wor niemols fott –  
Dä ahle Hass, die jliche Zoot:  
Om Maat verkäuf hä widder Nazi-Stuss.

Ävver mer verjesse nit,  
Weil dinge Mot die Kraff uns jitt:  
Mer wääde laut – mem Schweije es jetz Schluss!

Jo, verdötschte Küppers Karl:  
Et räant allt widder – üvverall!

## **Regnet es?** *Karl Küpper (1905-1970) zu Ehren*

*Du sitzt oben auf der Bütt.  
Im Saal weiß jeder, was jetzt kommt:  
Auch die Nazis in der ersten Reihe.*

*Rassenwahn und Braun-Hemd-Marsch –  
All das wird von dir verarscht –  
Die Goebbels-Propaganda, die ganze Hitlerei.*

*Du kriegst Prügel, kriegst Berufsverbot.  
Du weißt: Sie schlagen dich tot.  
Du gehst zur Wehrmacht – nicht mehr auf die Bütt.*

*1945 dann, im Mai:  
Unsere Stadt zerbombt, doch endlich frei!  
Du weißt, wo brauner Dreck im Keller liegt.*

*Ja, verdöschter [verrückter] Küppers Karl:  
Du hast gestört im braunen Karneval.*

*Wieder auf der Bütt, nach dem Krieg,  
Gehst du mit denen ins Gericht,  
Die da sitzen in der ersten Reihe.*

*Dieselben Köpfe: statt braun jetzt schwarz.  
Sie blasen wider dich zur Hatz.  
In Bonn, der Adenauer, ist dabei.*

*Der braune Geist, der ist nicht fort:  
Er macht dir das 'come back' kaputt.  
Das hält dein armes kölsches Heldenherz nicht aus.*

*Aber wir vergessen nicht,  
Weil dein Mut uns Hoffnung gibt:  
Wir werden laut – mit dem Schweigen ist jetzt Schluss.*

*Ja, verdöschter [verrückter] Küppers Karl:  
Es regnet schon wieder – überall!*

*Der braune Geist war niemals fort –  
Der alte Hass, die gleiche Sorte –  
Auf dem Markt verkauft er wieder Nazi-Ideologie.*

*Aber wir vergessen nicht,  
Weil dein Mut die Kraft uns gibt:  
Wir werden laut – mit dem Schweigen ist jetzt Schluss.*

*Ja, verdöschter [verrückter] Küppers Karl:  
Es regnet schon wieder – überall!*